



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Sudan north tsütsü Nile ayong nung
rong ka makepok, nisung 21 asü**

**Steve Smith PSL nung sen tasaktiba
agi alizükba asayar kümogo**



VOL. XXIII ISSUE NO. 121 (ADOK 121) DIMAPUR ROGONÜ (FRIDAY) TSÜKLAI (FEBRUARY) 13, 2026

₹ 5.00

ANATG-2015 lumia longkak aitba tesem melenshitsu

Kohima, Tsüklai/February 12 (TYO): All Nagaland Adhoc Teachers Group (ANATG)-2015 Batch ajanga Hokulbarnü nungi tenzüka lumia longkak aitba ya Directorate of School Education (DoSE), Kohima nung alitsü ta sangdongogo, aser adhoc tesayur 1,166 tashi regular mekumtsüba mechi longkak aitba tesashiba akumer.

Service regularisation maparen mapang talangka meinyaki aruba dak sendakba nung sorkari mapang telatet mesüra policy tejangja magütsüetba sülen iba telemtetba ya agi, ta ANATG-2015 ajanga sangdong ka nung ashi.

Iba telok yagi February 4 nü nungi tenzüka longkak aita arur, aser school education aser tesayur ketdangsüba department indang-indanga shilem agidaksütsü aser tekeraba nung ketdangsür nem mera agidaksütsü nükjidong nung longkak aitba tesem ya DoSE alidaki belener ta ashi.

Tang longkak aitba nung shilem ka ama Brehostibarnü nungi tenzüka lumia longkak aitba ya

Honibarnü nungi tenzüka Education Directorate nung alitsü, ta parnoki ashi.

Item tesayur telok yagi 2015 küm shimba adhoc tesayur 1,166 ya tekeratiba nung regular kumjang ta maneni akhangar aser mapang talangka atsülangba ajanga mapang nung süshia, senotsü aser inakyim balala nung tesayur aser parnok kibongtem timtem ajurur ta ashi.

Iba ya mapa atema akhangba kisung masü saka ochi, akhum aser policy shidak inyakba indang lir, aser aiben temulunglemtsü o shiaka mapa kuma meinyakba ajanga democratic yimya nung longkak aitba tesashiba akumtsüsa akum, ta ANATG-2015 ajanga ashir.

Parnoki state sorkar aser talisa School Education Department aser Directorate of School Education dang tim yimya nung jembishinüa tangatetep kati arutsü asoshi tekeraba nung mera agitsü ayongzük aser parnoki akhangba yamai senzüka yutsüra longkak aitba maneni tesashiba akumtsü, ta ashi.

Rio-i longkak aiter tesayur 1,166 dang aremzüka atatsü ajungshir

Dimapur, Tsüklai/February 12 (TYO): Brehostibarnü Nagaland Chief Minister Dr. Neiphiu Rio-i Kohima nung regular kümjang ta takhangba agüja longkak aita aliba adhoc teachers batch 2015 dang aremzüka atatsü ayongzük aser sorkari iba ken o asadangtar ta shia liasü.

Osangbener den jembidang, sorkari iba tensa kanga junga meteta lir aser tesayur temi akhangba kanga junga asadangtar, ta Rio-i ashi.

Sorkari parnok senzüka metoktsü saka telemtetba ka tatem kuma magidang inakyim shidak aotsüla, ta pai ashi.

Kasa mapang Advisor, School Education and SCERT, Dr. Kekhrielhoulie Yhome-ia, department-i parnok teinyaktsü inyakogo aser tang iba inakyim department of Personnel and Administrative Reforms (P&AR) nung lir, aser parnoki telemtetba agiba ya sorkar dangi yoktsü, ta

ashi. Finance department nungi senotsü osang nüngdaker, aser service dak sendakba ken o ya P&AR ajangtsüla. School Education Department tsütsü nungi nüngdakba mera ajak renemogo aser P&AR nem proposal agütsüogo, ta Advisor-i ashi.

Tesayur tem anepalutsü ya sorkar mapa lir, aser parnok aika yimya balala nung shim aser parnok kija indang tensa asadangogo, ta Dr. Yhome-i ashi.

Tesayur category pezü lir - regular, scheme dak ajemdaker, contractual aser fixed pay nung inyaker, aser metokmeperi ya system nung lir, aser bendanga agütsür inyaker ang 'secure jobs' mali, ta pai ashi.

Sorkari iba ken o bentettsü asoshi jemitagi, saka inakyim nung mapang agir, anungji tesayurtem school-i meyipa aotsü mepishir, ta ashi.

Coaching institutes tem register asütsüla: ANCSU

Dimapur, Tsüklai/February 12 (TYO): Kaketshirtem len aniba, ochishia inyakshangshiba aser yariba nung tajungba kumdaksütsü mechi All Nagaland College Students' Union (ANCSU) ajanga akhangba ama Nagaland nung coaching centre registration aser regulation mapa kuma November 26, 2025 nü tenzüka atema State sorkar aser tim Department dang pelar, ta ANCSU sangdong ka ajanga ashi.

Ajisüaka coaching institutes tem registration asüba nung menuba atema tebilemtsü akaba lemsateptsüsa akumer. Guidelines mapa kuma amshiba anogo nungi ita asem tsüngta coaching institutes ajungai registration atema apply asütsüla,

ta sangdonga aliba guidelines nung shia lir, ta ANCSU-i ashi.

Iba guidelines amshi tenzüker ita ana süyiaka tanü tashi coaching institute kata register masüba ngua temulung ajema bilemer.

Anungji Higher & Technical Education Department aser District Administration tem dang registration maparen tekeraba ung inyaktsü ajungshir. Kasa mapang coaching institutes ajunga dang tekeraba nung register süa guidelines nung aliba ama alitsü ayongzüker. Iba ken o nung onok saksalema alitsü aser registration mapang süyir sülen register masüba coaching institute kata melapokdaksütsü, ta ANCSU-isa ashi.

AISGEF-i jazüka longkak aitba nung CANSSEA-i shilem agi



Brehostibarnü Kohima nung Confederation of All Nagaland State Services Employees' Association (CANSSEA) züngsemtem longkak aيتدang tangokba noksa nung angur.

Kohima, Tsüklai/February 12 (TYO): Brehostibarnü All India State Government Employees Federation (AISGEF) ajanga linük tesem ajunga nung jazüka longkak aitba nung Confederation of All Nagaland State Services Employees' Association (CANSSEA) shilem agia Chief Secretary, Government of Nagaland nem tezüluba nung takhangba agüja liasü.

CANSSEA ya AISGEF den sendaktepa lir aser parnoki ashiba agi, Shirdi, Maharashtra nung January 23 nungi 26 tashi 18th National Conference alidang linük tesem ajunga nung state sorkar mapa inyaker dak kongshiba ken o jembia February 12 nü linük tesem ajunga nung longkak aittsü pangzüng renemba ama inyak.

Longkak aitba sülen parnoki Chief Secretary ajanga state sorkar nem '8-point Nationwide common charter of demand'

agüja liasü.

Parnoki contractual employees ajunga regular akumtsü aser contractual, outsourced aser daily-wage employment mamshitsü aser sorkar indang department aser PSU nung regular yimya nung tazüng aliba post nung nübu shimoktsü khanga liasü.

Parnoki PFRDA Act aser NPS/UPS agentsü, old pension scheme akhi ama amshitsü aser Pension Validation Act, 2025 agentsü khanga liasü.

Parnoki akhangba nung labour codes pezü agentsü, PSUs tem privatisation aser corporatisation akumba anentsü, sorkar indang departments ajemdaksüba anentsü, 8th Central Pay Commission lepa reprangshia küm pongu nung khien pay revision reprangtsü, contract nung mapa inyaker densema mapa inyaker aser pensioner atema

sorkari yaria health insurance scheme den cashless treatment agütsütsü dena lir.

Parnokisa education aser public health departments tashi itshitsü, National Education Policy mamshitsü aser tesayur atema compulsory TET order agentsü Constitution indang Articles 310 aser 311(2)(a)(b)(c) agentsü akhangar.

Chief Secretary nem iba charter agütsüba ajanga AISGEF-i anir linük tesem ajunga nung democratic mapa inyakba nung Nagaland state sorkar mapa inyaker adenba sayur, ta CANSSEA-i ashi.

CANSSEA office complex nung longkak aitba nung shilem ka ama CANSSEA General Secretary Yhunsenlo Kent, Press Secretary Siewatho S. Nyusou, NNPSGSEF President Avizo Nienu aser CANSSEA Joint Secretary Pekinto Y. Jimo nungeri o tatsütsü jembia liasü.

Dr. Kiremwati takum tembangogo, tanü asüpila sentong Kohima nung agitsü

Dimapur, Tsüklai/February 12 (TYO): Brehostibarnü Dimapur nung Dr. Kiremwati takum tembangogo.

Asür Dr. Kiremwati ya Naga nunger rongnungi mezüngbuba M.Sc. (Geology) renema azünger, Higher and Technical Education, Nagaland nung mezüngbuba Director aser North Eastern Hills University nung mezüngbuba Naga nunger Pro-Vice Chancellor inyaker ka liasü.

Pa asüba sülen Dimapur nung sarasadem mapang ka agir Kohima-i bener tugo, kong pa den asüpila sentong Solidarity Park, Kohima nung Hokulbanep 8:00 ako nungi agitsü aser iba sülen pa tasoyim Waromung bushia bener oa yangji aremstü.

Ao Kaketshir Mungdang-i pa asüba asoshi tejashi lematepa liasü.

Ozü lenir ya shisashir aser administrator, ajemalur, linük

meimer aser meranga inyaker ka liasü. Pa takum tepiyong Naga nunger tenzüka aru aser pai shisaluyim aser nübur tenzüka nung shilem tulu agiba kodanga mamatsü, ta AKM ajanga ashi.

Asen nüburtem asoshi tongshi tajung ka laogo. Mangyimer kibong den asükhü lemsateper aser asür tanüla teti tatem maka tesunep nung anisüngzükjang ta sarasademtsür, ta AKM sangdong ajangasa ashi.

Toyota aser IDAN ajanga sen crore 10 jenjang osettsüset amoktsü

Dimapur, Tsüklai/February 12 (TYO): State nung nüburtemi amshiba infrastructure tajungba aser tashi taitba kumdakja Development Authority of Nagaland (IDAN) aser Toyota tsüngta Corporate Social Responsibility Initiative kübok osettsüset lema agütsüba sentong ka Chümoukedima nung Brehostibarnü agia liasü.

Iba project ya 'targeted community development initiative' ka ama Kohima, Dimapur, Niuland, Chümoukedima, Tseminyu aser Zunheboto district tem awajemtsü asoshi inyak. Toyota aser IDAN lungjemer CSR framework ajanga healthcare

infrastructure tashi itshia educational facilities tajungba kumdaksütsü nükjidong nung iba maparen ya inyaka liasü.

Iba sentong nung sen crore 10 dak tema jenjang life support system aliba advanced ambulances pezü, medical facilities, saisapong nung amshiba oset aser kakat reju nung nüngdakba osettem lema agüja liasü.

Iba sentong nung jembidang, state nung talisa health aser education sectors tsütsü CSR inakyim tashi itshiba atema Nagaland Chief Minister Dr. Neiphiu Rio-i Toyota Kirloskar Motor aser IDAN nem tenüngsang agütsü aser terenlok

nüngdaka aliba aser nübur ajungtsü asoshi inyakshangshi tajungba kumdaksüba nung tongtipang mera ka alitsü ta ashi.

Rio-i state sorkar asoshi health aser education sectors ya tongtipangtiba lir ta ashi. Paisa iba sentong ajanga meta talang nung aliba nüburtema maneni yaritsü imlar ta shia liasü.

Deputy Chief Minister Y Patton-ia item osettsüset amoktsüba ya nüburtem meyong lir aser nüburtem reprangtsü atema masü saka anogoshi service agütsütsü atema lir ta ashi. Pai item osettsüset ya tajungtiba nung ochishia aser anepalua amshitsü ayongzüka liasü.

Peren nung Awareness & Sensitization sentong ayongzüka agi



Dimapur, Tsüklai/February 12 (Agencies): Directorate of Minority Affairs, Government of Nagaland-i ayongzüka Minority Welfare Schemes dak sendakba nung February 12 nü DC Conference Hall, Peren nung Awareness aser Sensitization sentong ka ayongzüka agiogo.

Sentong nung o jembiba mapang Director, Directorate of Minority Affairs, Rohit Singh, IAS-i, Minority Affairs Department ya tawa tentetba department ka lir koba 2023 kümang amenok, aser tang Peren semdangba ya state nung district trokbuba semdangba-ang lir, ta ashi.

Pai, linük nung Christians, Muslims, Sikhs, Buddhists, Parsis aser Jains nungertem ya minority ama züngshir, saka

Nagaland nungbo beneficiary telok nung Christian minorities tem lir, ta ashi.

Paisa, Centrally Sponsored Schemes (CSS) aser department-i nüburttem ajangzükdaktsü aterna sentong balala benoka inyakba indang stakeholder tem nem metetdaktsü aterna district shia nung outreach sentong ya ayongzüka agiyonga odar, ta shisem.

Sentong nung department-i benoka inyakba scheme tem indang PowerPoint presentation ka agütsü. LDA, Lily Tungoe-i Minority Scholarship Schemes indang metetdaktsü aser Joint Director, Directorate of Minority Affairs, Andrew C. Imti-i NMDFC aser PM VIKAS kübok Micro-Credit Scheme indang osang tejangja

agüja liasü, koba minority beneficiary tem nem senotsü teyari aser mapa inyaka aazüksü asoshi maongka agütsüba dak rangloker lir. Project Officer, Shalo Khing-i PMJVK nükjidong aser iba scheme nung keta alibattem indang metetdaktsü.

Sentong nung department aser office tekolaktem, district administration ketdangsürtem, jila aser yimtsüng nungi lenirtem aser tamangba yimsü balala lokti tentettem nungi züngsemtemi shilem agia liasü.

Sentong ya Joint Director, Directorate of Minority Affairs, Andrew C. Imti lenisüba nung agi aser ADC Peren, D. Robin-i lokti pela agizükba o jembia liasü. Sentong ya mendenbubai tepela o jembiba sülen tembanga liasü.

NSCN/GPRN-i asükhu lemsatep

Dimapur, Tsüklai/February 12 (TYO): NSCN/GPRN-i MIP ajanga Lotovi yimtsüng Ato Kukau (Hd.GB) aser Kilonser L.Honito Swu February 11 nü asüba osang angazüka mang ayimba lemsatepogo.

Lenir-i linük asoshi bendanga agüja inyakba ya tenüng asangtsü langa lir aser tulu tila

nati teti bilemteta tenüng asangtsü.

Asür Honito ya tongmelang aser ochishiba nisung ka aser tanen makai inyakba 'Nationalist' ka liasü.

Yimtsüng tekolak ka ama pa ya sobaliba wazüka ayur aser yimtsüng kümzüka ayur ka, yimtsüng nung mezümpur, lokti lenir aser lokti liba nung

temelenshi bener arutsür ka liasü.

NSCN-i pa tanüla teti tatem makdak anisüngzükdangja ta sarasademtsüba den asür kinunger aser medemertem nem mangyim jashi mapang Tsüngremi anisüngzüka agüjang ta sarasademja atar, ta kasa sangdong ajangasa metetdaktsü.

Painting exhibition ka Feb 12 nü lapokogo



Dimapur, Tsüklai/February 12 (TYO): Visual artist Moaso Aier indang "Where the Land Breathes Colour" ta nüngja agütsür painting exhibition ka Nagaland Art Center-i host süa Nagaland Art Center aser IMC la longjemer February 12 nü IMC Hall, Supply Colony, Dimapur nung ayongzüko.

Moaso Aier ya visual artist, independent curator aser musicologist ka lir, shiba inyakyim ya Post-Impressionist methods aser tziü mopung, arem shiruru aser süngtonglitong dak tera yangloka lir. La ya taoba mapang nternational Guild of Realism Art, USA indang züngsem ka liasü aser lai India, United States, Europe aser Australia densema national aser international jenjang nung la mapatem sayaogo. La ya 2010 küm nungi professional ka ama painting süa arudar aser la mapa ajanga craftsmanship atema bendanga agütsür aliba aser kodanga süitema maoba visual oshi sayur.

Alakteta jaoker ama iba

sentong nung o jembiba mapang NPTS Principal Aboli Metha, IPS-i, painting tem ya tashi tait teyanglutetba ka koba otsü aser tebilemdangba balala agi sünga lir aser iba ya tangoa angur aser ajangshiteter, ta ashi. Laisa, art tem ya kanga tajung ta ashiba den Tsüngremer sempet atema artist nem tenüsang agütsü, koba tenüng asangtsü langa lir, ta ashi. Laisa, Moaso dang Tsüngrem sentsüwangshi aser tangar ajungmesotsü atema la sempet maneni amshitsü ajungshia liasü.

Laisa, Ababe Ezung aser Sentienla na lenisüba nung amenokba art gallery tenüsangba jembia, shirnoki lanurtem ajungketba den parnok sempet sayatsü atema sabang agüja arudar. Maneni lai, Moaso ya painter ka dang masü saka internationally jenjang nung nüngtugu artist ka lir, ta ashiba den art luyim nung tetsürtemi takok tajung nguyonga aoba ngua kanga nema danga bilemer ta shisem.

New York semdangba indang lemstepba mapang lai, art supply store ka nung "The earth without art is just 'eh'," ta zülua aliba sign ka indang lemsatep, koba la asoshi kanga dang tajangzüka akaba osang ka liasü, ta ashi.

Laisa, "lokto kobai teyanglur nongitir iba loktiji renloka aoer," ta ashi.

Nagaland Art Gallery ambassador Sentienla Ezung-i o tatsüka jembiba mapang, tang renloka oya aliba artist aser national aser international jenjang nung nüngtugu artist tem sayatsü asoshi mapang talangka nungi bendanga agüja inyaka aruba indang lemsatep. Lai ashiba agi, iba gallery nükjidongji art ajanga tangazükba balala agütsüba asoshi lir.

Exhibition show ya February 12 nungi 15 tashi anogoshia 2 ako nungi lapoktsü.

Exhibition lapokba sentong ya pastor, Dimapur Christian Fellowship, Daroga Pathar, Moatoshi Imsong-i sarasademter tembanga liasü.

SÜR KÜM KA AJUNGBA ANOGO NUNG OJALA MENUNGRA BILEMTETER

MRS. SUPONGTULA (Mongsenyimti)



13.2.2025 - 13.2.2026

"Tenüsang ken 121:5 : Kibuba ne tanuker lir; ne teka tajichilen madak Kibubaji ne akhüm lir."

Oja, na akümüli nung alidang chirnur, semchisemnur aser adianutem asoshi taküm bendanga agüja temeim sayutetla Ojala, shisabulu khuret yipru mepong tesashi aruaka, kecha mali ama tepela jakten tener litetla tetsü.

Tanü onoki ne menüremjakten menungra bilemteter aser ne nem akhümtsüba agütsür.

~ Temeim chirnurtem, semchirtem aser adianutem

District Administration-i Dzükou morokmi asadang



Dzükou Valley nung nung tesem kar nung maneni mokozi longa aliba noksa nung angur.

Dimapur, Tsüklai/February 12 (TYO):

Deputy Commissioner Kohima, B. Henok Buchem-i anir District Commandant HG, CD & SDRF, Wopenthung; Nodal Officer DDMA, Thejangulie Zao aser Southern Angami Youth Organization (SAYO) tir Zasitsolie Beio nungeri February 11 nü anüng ajanga Dzükou Valley aser Mt. Japfü nung tang morok oya aliba asadango.

Asadanga aoba mapang Dzükou Valley anütok, anüolen aser anüotiplen aser valley den atonga aliba tenemkongtem kanga mejungi ronger aliba ngutetogo, saka mi adokbabo anenogo aser tesem kar nung dang mokozi longdar

Ajisüaka Mt. Japfü tsütsülen vally anütoktiplen morok maneni odar, koba Mt. Kahu leni ronga or ano Dzükou Valley nung merongi aliba tesemtem

arongtsü ana nung lir.

Talisa Kigwema tenemtsüng kanga sashia arongtsü tsübua bilemer, kong süngtong takok talangla aika lir aser arem kanga temeim lir. Iba ajanga morok mi mazüoktetei rongyonga aotsü lendongbang nung toktsür.

Longrenlongbang agi sünger gari lenmang maliba ajanga tongtibang tesemtemi mibenertem meyocteter.

Tensa mejungi aliba aser iba ajanga tziü mopung aser arem shiruru dak kongshitsü aliba apir iba team yagi anüng ajanga tziü yoktsü asoshi Indian Air Force helicopter tem tangsa tang yoktsü benokdangogo.

DIPR team katia morok mi agi Dzükou raksatsüba mangaoka ayutsü atema iba valley semdangogo. Dzükou nung morok mi ya January ita tatembangbuba hopta tenzüka aser tang tashi rongdar.

US-India tsüngda interim tezüngzüktep anema longkak ait



New Delhi, February 12, 2026: Brihostibarnü nü Parliament kima Congress MP Priyanka Gandhi Vadra, senden nungi anentsüba MP tem- Hibi Eden, Dean Kuriakose, Prashant Padole, Manickam Tagore aser tanga opposition MP temi India-US interim shishilembaba tezüngzüktep anema longkak aitba noksa nung angur.

New Delhi, Tsüklai/February 12 (Agencies): India aser US na tsüngda shishilembaba dak sendakba nung renemba interim tezüngzüktep anema Brihostibarnü India tesem aika nung trade unions aser aluyimertemi longkak aitogo.

Iba tezüngzüktep ya ajanga aluyimertem, tilateri business inyakertem aser mapa inyakertem takoksa angutsü, ta parnoki metetdaksü.

Brihostibarnü Parliament nunga opposition party temi sorkar dang iba tezüngzüktep agienang, ta takhangba agütsü. Parnoki Ato kilonser Narendra Modi aija "Narendra Modi, Surrender Modi" ta yimyim ayima liasü.

Anogo piyong longkak aitba

ajanga state kar nungbo public services aser manufacturing sector kongshia liasü.

Trade Union lenir kati, US den agiba tezüngzüktepji ajanga India nung market nung US nung alu nungi züsentetbatem subsidized jenjang nung angutsü, aser ibaji ajanga India nung aluyimertem million aika takoksa angutsü, ta metetdaksü.

All India Trade Union Congress nung general secretary, Amarjeet Kaur-i, "America nung alu nungi züsentetbatemji India nung market nung jenjang dalang agi angutsü aser ibaji ajanga asen aluyimertem aser aser tilateri business inyakertem takoksa angutsü," ta ashi.

Ajisüaka sorkaribo, iba tezüngzüktep ajanga export asüba jenjang ajungkettsü, investment jenjang ajungtsü aser US den asalentong tesendaktep tajungba akümtsü, ta ashir.

Tan ita India aser US nati, kobi melii shishilembaba dak sendakba tezüngzüktep agitsü, ta sangdonga liasü.

US nung India nung osettsüset nung saru shilem 25 agia aliba nungi shilem 18 dang akümtsü aser India-i Russia dang totzü aliba atema saru tali shilem 25 agia aliba ya magitsü.

Ajioda India-i Russia dang nungi totzü alizükba anentsü aser India-i dollar sen billion 500 jenjang US nung osettsüset alizüktsü.

India-i Rafale fighter jet 114 alizüktsü

New Delhi, February 12 (Agencies): India-i France dang nungi Rafale raraba tayimtsü 114 alizüktsü atema Defence Acquisition Council (DAC)-i agizükogo.

Iba tezüngzüktepji sen 3.25 lakh crore jenjang asütsü aser India nung puti otsü nung defense dak sendakba tezüngzüktep tulutibatem rongnung ka asütsü.

France Tir, Emmanuel Macron-i India semdangtsü hopta ishika dang lia Defence

Minister Rajnath Singh leniba nung amenba DAC senden nung Rafale tayimtsü 114 alizüktsü atema senotsü lemozüktsüba agizük.

Tang Indian Air Force (IAF) ket nung fighter squadrons 29 dang lir, saka sanction süa alibajibo squadron 42 lir.

India nung arrtsülen tip ajaklen security tsütsü amokmeren tamajungba dang akümbe mapang nung Rafale tayimtsü 114 alisemba ajanga

IAF jenjang tajungba akümtsü.

Taoba ita Defence Procurement Board nung agizükba sülen tang DAC-ia agizük, anungji kobi melii India-i French manufacturer Dassault Aviation den tezüngzüktep agitsü.

Tang nüngdak apir Rafale tayimtsü 18 bo France nungi indangindanga angutsü saka tanünga tayimtsü 96 jibo India nung yanglutsü. Iba project kübok tayimtsü shilem 80 bo India nung 'assemble' asütsü.

Air India tayimtsü tsükoktsü lia pilot-i totzü control switch shibang

New Delhi, February 12 (Agencies): Italian media report ka ajanga, Air India tayimtsü 171 tsükoktsü lia pilot-i metetsümonga tayimtsü nung totzü control switch shibang asütsüa akok, ta metetdaksü.

Iba tatalokba bushisüngdangertemi cockpit data bushisüngdangdar, aser tayimtsü metsükokdang totzü switches ji "cut-off" position nung ayu asütsüa akok ta bushiteter, ta kasa osang ajanga metetdaksü.

Tang iba osang dak sendakba nung Air India-i telangzüba kecha magütsü, ajisüaka parnoki iba tatalokba bushisüngdangertem den akokba tashi yaritepdar, ta metetdaksü.

Yaküm June 12 anogo nung atalokba lendong nung asür Captain Sumeet Sabharwal tebu, Pushkaraj Sabharwal-i Supreme Court dang iba tatalokba ya judicial ajanga bushisüngdangtsüla ta takhangba agütsüogo.

Federation of Indian Pilots (FIP)-ia iba tatalokba bushisüngdangba mezüngbuba shilem ashishiba den külemi bushisüngdangba nung pilot medendaktsüba ashishia iba ya judicial ajanga bushisüngdangtsüla, ta takhangba agütsüogo.

Temepishiba ken o agütsürtem jagi Aircraft Accident Investigation Bureaus (AAIB) indang preliminary report ji ashishir. Iba report nungji cockpit voice recordings nung ajemdaker pilot-i aibelenba ama sangdonga liasü.

Temepishiba ken o agütsürtemi Supreme Court dang, iba tatalokba ya judicial ajanga bushisüngdangtsü atema sorkar nem tetuyuba agüjang, ta mepishi.

Parnokisa, iba lendong atalokba atangji kuli jangjatsü aser tarutsü nungbo item ama tatalokba nokdangtsü atema iba tatalokba ya lenla ajaklen nungi asadangtsüla, ta ashi.

West Bengal election nung Congress-i tangar den meloktepi tokteptsü

New Delhi, February 12 (Agencies): Taruba West Bengal assembly election nung Congress party-i tangar den meloktepi tokteptsü.

Bengal nung Congress jenjang mejungi lia parnoki Left den-a tesendaktep raksaogo aser parnoki tangar den meloktepi menden ajak (294) nungi tokteptsü.

2021 küm assembly elections nung Congress-i menden ka nunga takok mengutet aser parnoki vote shilem 3.03 dang nguteta liasü.

Ano 2024 küm Lok Sabha elections nunga Bengal nung Congress-i menden ka dang angu.

Election anaprongla nungji Congress-i Left den lokteper toktepa liasü. Item election nung Congress aser Left nati Mamata Banerjee sashia aija liasü aser BJP-ibo jenjang tera junga ngutetba ajanga tongti opposition party aküm.

2016 küm assembly election nung Congress-i menden 44 angu saka 2021 küm nungbo menden kata mangu; ano külen 2016 küm BJP-i menden 3 dang angu saka 2021 küm election nungbo menden 77 tashi nung takok nguteta liasü.

Taruba Bengal election atema Trinamool Congress aser BJP natibo inyakshangshi tenzükogo, ajisüaka tang tashi Congress bo marakzü.

Tesüiba küm 14 tsüngda Congress party tashi itta aliba state aika nung regional party tem jenjang tajungba kümogo.

Form No. 3
[See Regulation-13 (1)(a)]
DEBTS RECOVERY TRIBUNAL
GUWAHATI
Suwarna Bhawan, House No. 12, New
Town Path, Near Hanuman Mandir,
G. S. Road, Ulubari, Guwahati- 781007
(Assam)

Case No.: OA/444/2025
Summons under sub-section (4) of
section 19 of the Act, read with sub-
rule (2A) of rule 5 of the Debt Recovery
Tribunal (Procedure) Rules, 1993.
Exh. No.: 5514
BANK OF MAHARASHTRA
-Vs-
SMTI SENTILA JAMIR
To,
(1) **SMTI SENTILA JAMIR**
Daughter of Temjen Jamir, H.No-
15, Naga Colony, Dimapur, Sadar
Dimapur, District Dimapur,
Nagaland, Pin- 797112

JAOKER
20.01.2026 anogo nung Presiding
Officer/Registrar matsüngdang **OA/**
444/2025 benoka liasü. Iba Tribunal
yagi sentsüh **Rs. 2697337.71/-**
alangzüktsü atema na anema
benoka aliba (OA) nung iba Act nung
section 19(4) kübok Application
nung ajemdaker na jaoker/notice
agütsür (application den
documents etc. densema lir).
Iba Act nung section 19 kübok sub-
section (4) nung ajemdaker na aser
defendants dang teküoklen
alibatem tuyur :-
(i) tabaja agütsüba sülen anogo
semer nü tsüngda relief asoshi
mepishibaji kechiba magütsütsüla,
iba kuliji sayutsü metetdaksür;
(ii) Original application nung serial
number 3A kübok applicant-i shia
aliba kiojen aser assets dak alia
tanga kiojen aser assets
sangdongtsüla;
(iii) Original application nung serial
number 3A kübok shia aliba kiojen
aser assets ayoktsü mesüra item
kiojen atema inyakshangshitsü
memelar;
(iv) Security interest atema
inyakshangshiba dak alaka Tribunal
dang nungi jelia temelaba magii
original application nung serial
number 3A nung shia aliba kiojen
mesüra tanga assets ayoktsü,
lease asütsü mesüra tanga kecha
inyakshangshi masütsüla;
(v) Ordinary business ajanga
secured assets mesüra tanga
assets aser kiojen nungi yokzükba
senji security interest soita aliba
bank mesüra financial institutions
indang account nung deposit
asütsüla.
Nü dang tezüluba nung sangdong
applicant nem agütsütsü tuyur aser
06/03/2026 anogo nung anepdang
10:30 ako nung Presiding Officer
matsüngdangi arutsü tuyur, yamaji
meyakra application ji angadangtsü
aser na meliaka telemetba agitsü.
22/01/2026 anogo nung
tsünglanglen kü meyangnem den
iba Tribunal indang seal agütsür:
Registrar, Debts Recovery
Tribunal, Guwahati



February 12, 2026 nü Patna nung Bihar Chief Minister, Nitish Kumar Budget senden nung adentsü atema assembly-i arudang tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, FEBRUARY (TSÜKLAI) 13, 2026

O Mekümdangi Jembiba Lenirtem

- Tangsen Lemtur

Kobi melii kidanger state Assam nung assembly election agitsü, anungji sorkari lenla balala nung liromedema terenlok mapa kanga arisanga inyaksü melen chief minister, Himanta Biswa Sarma-i mapang shia Muslim nunger anema tesempa o jembiba arudar. Ibayongji anogo ishika tejaklen karibo pa anema court nung ken o benokogo. Talisa pai Bengali-origin Muslim nungertem ya lisopurtem atema amokmeren, ta shia state nung Muslim nunger timtemdaksütsü ajungshir. State nung tzümetzüng lendong atema-a pai Muslim nungertem nem tai tongloktsür aser parnok sempadaksütsü atema tashishitsü otem jembir. CPI(M)/CPI-i Sarma anema Supreme Court nung temepishiba ken o ka benokogo. CPI(M)CPI-i, Chief Minister-i office tenangzükba agiba mapang nung senso ajak temeden kümzüktsü tenangzükba agiadokogo, anungji Sarma-i tesempa o jembiba atema Bharatiya Nyaya Sanhita aser Representation of the People Act kübok pa anema ken o akatsüla ta shiogo. Linük temzüng kübok temaba menden ka- Chief Minister office nung amener kati Assam nung aliba Muslim nungertem anema jembir, amokmerener aser parnok anema inyaksü ajungshir, ta shia Supreme Court nem temepishiba ken o agütsüogo. Ajioda Supreme Court-i ken oji angadangtsü melungogo. Tawa social media post ka nung Chief Minister Himanta Biswa Sarma-i prangpong ka amer Muslim nunger ana noksa nung injang khaloktsüba lemsatep aser idakji 'ana nungi akahba' aser 'taochi mesayutsü' ta zülua liasü. Social media post ji tangbo agienadokgo. Mapang shia yimsüsürtemi o kanga mekümdangi jembibayong küm pongu tejaklen taoba mapang BJP Tir, Amit Shah-ibo Haryana Chief Minister Manohar Lal Khattar, Union Minister Mahesh Sharma, BJP MLA Sangeet Som, Sakshi Maharaj aser Sanjay Baliyan nunger jaoka tekümdangtsü o shia merenshia liasü. Kasa küm nungjisa Union Home Minister Rajnath Singh-ia Union minister ana- V K Singh aser Kiren Rijiju nati o mekümdangi jembiba aija liasü. India ama linük ka nung nütsüng million aika madak lenirtemi kanga tashishitsü o jembiba ya kanga tamashi. Tang linük nung mepetmesü jenti aliba tensa ka nung o kanga kümdanga jembiyonga mashiyimi rateta agitsü mela-melar, ibayongji tilartemia pei o kanga mita jembir anungji parnok ama bangdak lenirtemibo kangasa shisadanga jembitsüla. Tang linük nung bangdakpurtemi linük rongsenkettsüng jenjang aintsü aser sensak tia nung alir million aika nem taküm jenjang tajungba agütsütsü asoshi kanga meranga inyakba mapang ka nung lenir kari o mekümdangi jembiba ajanga arok tenüng menüktsür. Tang alima nung rongsenkettsüng kanga kera ainba linükji India lir ta aikati züngshir, ajisüaka rongsenkettsüng ainba kijaji masü nüburtem tsüngda tesünep nung ali nungang linük aintsü aser azükarutsü, kechiyong alima linük aikati India nung senotsü jenti indoka shishilembatsü mulunga liaka linük nung tamangba lokti tsüngda tesempatep aser mepetmesü lira bendang linüktemi India dak merangloksü aser tejak meyiptsü ana nung lir. Pei temeli mazüokteter aser mepetmesü adokdaksütsüsa mapang shia o mekümdangi jembirtemji ketdangsertem menden nung amentsü malang. Item ama lenirtem dang nungi nüburtemi kechi tajung imlatsü? Supreme Court nung Sarma anema ken o angadanga pai aibelena lira aser temerenshi agütsüra ibaji lenirtem aika atema tansütsü 'lesson' ka asütsü.

OLEMSABANG

AO KIN TATOK MESHIBA, ASER SOBALIBA

~ P. Renthly Jamir

(Yashi adok nungi...)

TANABUBA- Aor Sobaliba Asentenshi - Ao lima Yisu yimsü arur rongsen nübu jenti entoka Naga nurger kin teimba dang Aori iba yimsü tajung sayu. Parnoki Ao oshi jembir Ao ken aten Tsüngremi Ao kin temaba jenjangi ajungket. Yisu alima tesangwa temoatsü yalok. Lia Lia arudang Aori iba yimsü agi lakteta atok. Aser tenem tanemi tejen putu sobaliba tamajung koba asenoki toktsü iba den temba yima aji asentenshitsu tenzük. Tang Aor lokti ajak bangpet jembibaji Watsur, AKM, Lanur telok "SOBALIBA TESAMAR" ta ayimtener. Aor Sobaliba aser libaliru tamajung ajak Khristan yimsü arur pasasa tzü agi punger ao, mi agi rungtok, saka sobaliba tajungtem ajak tamanger kibongtem nung shitak lir. Tang Ao kin-i Khristmas benjong senzuka toktsüogo. Akhidang 26th December anogoa ken tena pelatepa amung. Tanübo joko Khristmas mapang kentenba ola to mangashir benjong sopu to meyanglur, arogo aika nung stentepa ishiba agir. Good Friday sentep to züzüa ka dang süidaksür. Alemli Khristmas sodi arutsü yongya tangbo toklang tenzükéri anir khristmas yongyaba mali aser Aortemi Moatsü Tsüngremmung dangi meyip sobaliba asentenshir ta arogo kar nungbo sobaliba sentep agiba nguogo. Ano Pastortem aikati Moatsü Tsüngremmung nung waist coat semer wajah nung mena aliba angur tamanger tajung aika Khristmas masü Moatsü Tsüngremmung atongtsü yongyaba angur aser yar tsüngsangi aotsü jangrateper. Ano Aor Sobaliba nung maliba tetsürtemi yar aotsü jangrateper. Aor Sobaliba nung tebur dang moatsü Tsüngremmung nung yar. Moatsü dang tetsür kodanga yar maor Tebur dang yartsü. Tanü asüng tetsür tebur abangteper yar tsüngsangba ya tanü asüng puraba ka dang lir. Saka arogotsür temiang tesabuba, tetsürbo Elangtsür aodang sü achidang dang tsüngsanger. Moatsü dang tebur yarba onsara jangratemtsüka onokia tanur asüadangang angu, aser aji limapur, arogo nunger yar aotsü Tsüngremi mulungba masü. Arogo nunger ka Moatsü dang limapur den anidaka meter ishika yar aoba Tsüngrem nungi temerenshi tulu anguba nia nguogo. Kechiyong Tsüngremi temeshipur tamang tendanger Satania temeshipurang atidianger.

Tang Aor ochi tamang masü sobaliba nem anidaktsüba kin ka kuma tejakleni aotsü melena tangar kin sülen anidakba asenoki angur. Kecha lima nunga sobaliba nem anidaktsüba kin uluba alima otsü nung mangutsü. America lima uluba indang President Andrew Jackson-i yamai shia angur The Bible is the rock on which our Republic rests. America yimliji Laishiba nung amendaka lir. Parnokbo sen Dollar nunga In God We Trust, ta ajenloka lir. Africa Embassy nungi Chubai senpet tulu bentsur England lima uluba miim tasa metetnua England Chuba dangi yok. England Chubatsür Queen Victoriai ner Chuba dang iba yagi England yimli ulur ta shiang to sür Laishiba ka bener yok. Asen Ao kin kechiba pi sülen akümer. Asenoki tamangba yimsü toktsür Sobaliba asentenshir. Lai puti meteter Beaven-i yamai ashir Khristan yimsüji tejakleni aoba, iba yagi tesüleni aotsü memetet. Christianity is a religion of advance. It knows no way of retreat. Ao kin tejakleni oa yimliji ajungketnura tamanger ajaki pei chir dang Laishiba zünga temeshi ken atentsü sayutsüla Khristmas, Good Friday yamala senzuka toktsür alima shi aser yi benjong sabuba nungi peisasa shi aser tanela kümzüka alitsü ajungshia yangji intedaksütsüla. Sura Ao kinji memeteti ajungkettsü. Aor tai menaba Hornbill- Tanü Nagaland governmenti iba benjong ajanga Naga kin ajak pei tamangba Khristan yimsü toktsür akhi tejen putu sobaliba asentenshidaksütsü meranger. Yaküm 2025 kumbo joko iba tesem nungbo linük nung yi mayoktsü temzüng ayuba ajak salaba asenoki ngua aruogo. Babelon Chubai hon sungyanglu külemdaksüba ama Tenem ozü koba Aor otsü nungbo tatettsü ozü lir. Longkongla aser Tenem ozü tepen tatalokba, Tapur ana Tenem sep agitsü aoba Nokrang yimti Tenem ozü ka agi samaba Longputsür Imrongnaro aser tatongtsü Tenem ozü ka akoseta süa aliba nguli arüri lepsetba, ozü yimer kati Kirtsüng nung Tenem ozü ka kasetba kinungtsü asüba otsü jembir. Tangbo Aortema yimshia Horn Bill tekülem daki aotsü rakteper. Sobaliba shi yi benjong Naga nunger-i joko Khristmas masü Horn Bill benjong yongyateper. Meghalaya Governmentbo 2026 January 12 nung yamai State Sorkar policy tasenba ajanga Meghalaya ya Christmas benjongmong atema Top destination ta züngshia Tourism ajungkettsü lenmang tajung yanglua oliorar tanendak teperi yanglutsü ta renemogo. Ao Kin temaba jenjangi ajungketnura sobaliba asentenshiba Horn Bill-i aotsü yongyaba ya anener. Temeshibai kin ka ajungketer ta ochishia Kati ka taoba ta lungjemer mera tasen meraa aotsü mapang tongogo ta bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Putin-i yimsü azüoktsü atema Russian Orthodox Arogo amshir



February 03, 2026 nü International Religious Freedom Summit nung National Endowment for Democracy-i sponsor asüba "The Kremlin's Use of the Russian Orthodox Church in the War Against Ukraine," session nung shilem agirtem tangokba noksa nung angur.

February 12, 2026: Russia Tir, Vladimir Putin-i Ukraine nung dang masü saka arrtsü adener tanga linüktem nunga yimsü azüoktsü atema Russia Orthodox Arogo amshir, ta Arogo nung lenirtem aser meimchir temeden atema inyakbertemi metetdaksü.

February 03, 2026 nü International Religious Freedom Summit nung jembidang Ukraine nung meimchir temeden atema inyakba organization Truth Hounds nung co-director, Dmytro Koval-i, 2014 küm nungi tenzüka Russia-i anüdoklen Ukraine atsüngba mapang nungi Russia-i Russian Orthodox Arogo amshir, ta metetdakja liasü.

Koval-i, "Russian Orthodox Army ta ser units lir aser ibaji Russian Orthodox Church den sendaktepa lir. Item units yagi Russia lima indang tangatetba benshir aser Arogo amshir," ta metetdaksü.

Russian Orthodox Army ya 2014 küm tentetba Russian separatist paramilitary telok ka lir aser parnoki Donbas nung Ukraine sepaitem den rarar. Iba telok ya tangbo Oplot Fifth Separate Infantry Brigade nung denogo. Parnoki rara nung shilem agitsü atema Russia nunger ajungshir, ta Koval-i metetdaksü.

"Russian Orthodox Army nung parnoki 'crusade' ojang amshir iba crusade ji Ukraine nung tsükchirtem anema dang masü saka anüolen linüktem anema-a lir," ta pai metetdaksü.

Russia-i Ukraine nung Arogo lenirtem aser Khristantem tepseter, iba denji külemi Tenla kitem raksatsür, ta pai metetdaksü.

Koval-i, Russia-i mapang talangka nungi arrtsü adener-a yimsü azüoknua liasü, ta tamalen U.S. Commission on International Religious Freedom report ajanga-a metetdakja lir, ta Koval-i metetdaksü.

Europe nung aliba Russian Orthodox putir, Rev. Andrey Kordochkin-i yimjak nung Russia-i Ukraine amakba aitsüba sülen pa Moscow

patriarchate nungi anenja liasü.

Rev. Andrey Kordochkin-i, "Russia-i Arogo amshir aser official sarasadem nunga amshir. 2022 küm September ita nung benokba sarasadem 'text' ji reprangdangra sarasadem mesüker saka atangji nungbo ibaji yimtenren sangdong lir," ta metetdaksü.

Kordochkin-i, "Russia-i Ukraine ya linük ka ama magizüker. Iba sarasadem nungji Russia ya tashiyim amshir ka ama masü saka takoksa angur amai lir," ta metetdaksü.

Tongtibangsüa sarasadem nungji tai toktep atema masü saka takok anguba indang shia lir. Khristan putirtemi "takok" melen "yimjung" ta amshira putir nungi anentsür, ta pai ashi.

"Osangbenertemi Moscow Arogo nung otongdar ka dang, putirtem anema yamai inyakba ya taochi maket mapa asü?, ta asüngdangba langzüdang otongdar jagi, Arogo ya army amai lir. Army nungji tenangzükbba agiba sülen nangzükbba amaji meinyakra temerenshi lir. Yamaji putirtem aser deacon temia parnok ordain asüba mapang nung tenangzükbba agir, ta ashi. Anungji Arogo ya sepai ama

kümogo," ta pai metetdaksü.

Tawa Moscow Patriarch Kirill-i, Russia nung linük tangatetba anema inyakbertemi pei tetsü taso li ashioktürtem ama züingshitsu ta jembiogo, ta Rev. Kordochkin-i metetdaksü.

Russia nung tongti putir, Kirill-i Russia Tir Putin-i Ukraine amakba pusemba atema tamalena aikati Kirill aija liasü.

Tamalen Canterbury nung tongti putir, Welby-ia Kirill dang yimjung atema yimjak nung jembitsüla, ta mepishia liasü.

Senden ka nung jembidang Welby-i, "Yisu Khristai Par nütsüngtem dang yimjung yanglur kaka asütsü atema ayongzüka liasü, anungji iba tayongzükbba nungji asenok longjemtsü nüngdak. Ukraine nung nüburtem nem temeden agütsütsü atema yimtenren lenirtemi inyaktsü asoshi asenoki aseni akokba tashi inyaktsüla," ta ashi.

Kirill aitsüba olen ka nung taoba mapang Pope Francis-ia, Arogoi yimtenren oshi mejembitsüla saka Yisu Khristai jembiba oshi jembitsüla; Arogoji yimjung yanglurtem asütsüla, ta metetdakja liasü.

ANOGO ABEN TSÜNGREM DEN

Taochi aser tesünep

"Asen Tebu Tsüngrem aser Kibuba Yisu Khrista nungi nenok dangi taochi aser tesünep süang."
- Rom 1:7

Efesa nung arogo teku dangi züluba shiti shia "Nenok den taochi liang, aser asen Tebu Tsüngrem, aser Kibuba Yisu khrista taochi nenok den liang" ta tenzü. Ibai Pauli taginüba o ka dang züluba masü, saka ochi temeim agi zülü. Ibai teti tesütep o talisa küm tasen ka tenzükdang ibai kanga tapet lir. Idaki ochi tulu asem dena lir, Tebu Tsüngrem, Kibuba Khrista aser tamangertem asoshi temoatsü. Asenok tesüngmangtsü mapang ka nung lidar. Mangashiba osang angashir, manguba oset angur, meimlaba tashidak agi nisung jenti asür, scientisttem raraba oset akidang meyanglutet aliba yangluteta amshir. Alima kanga dang karaa melenshia aor. Telatet kecha maka kin kati kin ka raksatsütsü teraksatsüba tashi tait oset adoker. Iba ama lima ka nung alidang asenoki tarutsü jenokdak atema bilemer aser asenok temulung alemdakji Khrista tesayuba, tematiba Tsüngrem indang tesayuba nung anisüngzüker. Ibaji dang teperi masü. Iba dang tali tematiba Tsüngremji asen Tebu lir. Ajak Pai yanglu, ajak Tebu Pa asünung alima ajunga nung aliba meimchir tembar küma tesünep nung alitsü aji Pa nükjidong. Saka ano Pauli Khristaji kibur ta ashir. Tejen Lai Yihova aser Tasen Lai Kibur ta amshi. Tebu aser Techir kasa dang. Tetenzük Techir Tebu den liasü, aser Pa ajanga ajak yanglu. Kibubaji teti tatem maka Tsüngrem chir , shiba dak meimchir aria bilemba Tsüngrem ain alir. Pa otsü nung kibur. Pa chuba ka ama arutsü asenoki yongya atar. Pa kodang arutsü shingai memetet- Pa taküm küm arutsüa shibai metet!

Pauli taochi aser tesünep asenok nem agütsütsü sarasadem. Item o ana ya jangratemtsü otem lir. Yangji taochi tetezü Tsüngrem temeshi temeim asenok nem agütsüba lir. Tesünep tetezü junga aliba. Aiben asenok Khristantemi asenok shidakba nüngdakji mangateter! Sen kara , temaba jenjang nung lira, sempet tulu kara, mesüra anema lira, asenok junga alitsü ta aikati bilemer! Masü, asenok shidakba nüngdakji "taochi aser tesünep" lir. Tsüngrem tenüng sangang.

tembangba sülen anasa aliba awatsüng ka nung kaketshir 200 dak tali baptia liasü.

Iba mapang nungjagi tenzüka UniteUS sentong balala nung kaketshir 120,000 dak tali denogo aser meyrjang aikati Yisu sülen anidaksü telemtetba agiogo.

UniteUS sentong ya FSU, Alabama, Georgia, Cincinnati, Grand Canyon, Tennessee, Oklahoma aser Purdue nung aliba University campus tem nunga agiogo.

Yaküm september ita nung Tampa nung aliba University of South Florida nunga iba sentong nung kaketshir 1,000 dak temai Khrista agizüka liasü aser baptirtem rongnung taoba mapang mojing külemer kata densema liasü.

Iba sülen November ita nung

University of Central Florida nung nisung 1600-i Khrista agizük

February 12, 2026: US tesem balala nung aliba college campus aika nung UniteUS revival sentong aika agia arudar, yamaji Mongolbar aonung University of Central Florida nunga iba sentong nung kaketshir 1,600 dak temai Khrista agizükogo.

UniteUS campus outreach ministry tenzükla, Tonya Prewett-i, University of Central Florida nung ayongzükbba sentong nung kaketshir 1,600-i Yisu sülen anidaksü telemtetba agiogo, ta metetdaksü.

Lai Instagram ajanga, "Yisu Khrista tenüng ajungkettsütsü atema kaketshir 5,000 dak tali University of Central Florida nung adenshia liasü. Kaketshir noklang aika baptiogo. Tsüngrem dak mamangertem-

a aika tangbo Khristan kümogo. Tesüngmangtsü aonung! Tesüngmangtsü Tsüngrem!" ta metetdaksü.

Küm asem tejaklen UniteUS tenükba sülen college campus 20 dak tali nung asentenshi sentong aika ayongzüka agiogo.

2023 küm February ita nung mezüng Asbury Awakening agiba mapang nung Tsüngrem Tanelai kaketshirtem aika dak mapa inyaka liasü.

IF:Gathering tentetla, Jennie Allen aser sayutsüngir Jonathan Pokluda nati 2023 küm September 12 nü Auburn University nung asentenshi sentong ayongzüka liasü aser iba sentong nungji nisung meyrjang aika adenba ajanga sentong ayongzükertem kanga süngmanga liasü. Iba sentong

NC State nung ayongzükbba sentong nung nisung 6,000 dak tali aden aser noklang aikati Khrista agizük.

December ita nung Nashville nung high school student tem atema UniteUS sentong ayongzüka katsü aser iba sentong nungji kaketshir 1000 dak temai Khrista agizük.

Osangbener den jembidang P r e w e t t - i , "Tainlonglongpurtemia Tsüngrem metetner. Kaketshirtemi high-school azüngertem atema-a item ama sentong ayongzüka kajang, ta onok dang mepishia liasü. Iba sülen hopta asem tsüngda sentong ayongzük aser mezüngbuba Unite High Schools sentongji kanga takok ngua agi," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tzünglupu**

(adv) tzünglu jang tululu tzüka tzünglu aruba (heavy rain with large rain drops)

* Tzünglupu agi alu nung aonsutsü raksatsür.

Tzüngluruwa

(n) mei mapang (rainy season)

* Tzüngluruwa mapang lenmang nung anentsü alur.



Tir Yimyim

OLONG PAITEP # 7413

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashitem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 7412 TELANGZÜBA**TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

Assam nung ali bigha lakh 20 atsünga lir: CM Sarma**Himanta Biswa Sarma**

Guwahati, Tsüklai/February 12 (Agencies): Assam state sorkari February 10, 2026 nü Karimganj district nung eviction drive ka inyakogo ta Chief Minister Himanta Biswa Sarma-i ashi.

Sorkari aser forest ali atsünga agirtem meindokba

maparen nung iba ya shilem ka liasü ta pai ashi.

Assam nung ali 26 nungi 27 lakh bighas shi ka atsünga agia lir. Ajisüaka temsüa aliba lisopurtem nem land rights agütsüra ali meyipa agitsüba total area ajema akümtsü ta CM Sarma-isa ashi.

"Nenoki reprangdangra, ali 26-27 lakh bighas shi atsünga lir, saka kodang lisopur nem forest pattas agütsüdir parnok ali madentsü. Iba ajanga ali 20 lakh bighas shi ka meyipa agitsü" ta paisa metetdaksü.

Sorkari ali atsünga agirtem aser lisopurtem tsüngda tebandang yur mapa inyaker ta paisa shisem.

Külen, Supreme Court-i February 10, 2026 nü Assam sorkar nem Doyang Reserved Forest aser Golaghat district nung temeket yimtsüngtem nung ozüng alema alirtem jangjatsü atema luden ka tentetsü temelaba agütsüogo.

NSCN (IM)-i security forces aser Kuki nunger telungpurtem aitsü

Imphal, Tsüklai/February 12 (Agencies): National Socialist Council of Nagalim (Isak-Muivah)-i, Manipur nung Ukhrul district kübok Litan yimtsüng nung teraksatsüba bener arutsüba atema Indian security forces aser Kuki nunger telungpurtem aitsüogo, aser ashiba agi iba ya Naga Nation anema inyakshangshiba ka lir.

Media sangdong ka ajanga NSCN (IM)-i ashiba agi, mangatettep tilaterika kong Kuki nunger kari Tangkhul nunger ka dak züka liasü, iba ken o ya Tangkhul kin dak tenük yoker inyakshangshitsü atema amshia liasü. Parnokisa Litan nung tatalokba indang

koba Kuki nunger lokti tentettemi metetdaksüogo, iba ya shitak masü ta ashiba den ken o nung security force temia shilem agiba ya taoksatsüka ta ashi.

Lendong koba February 8 nungi 10 tsüngda ataloka liasü, iba mapang Litan police station kübok Litan Sareikhang yimtsüng nung nisung aliba ki 50 aser sorkar quarter aika raksa liasü.

NSCN (IM)-isa, Kuki nunger telungpurtem den security personnel temi külemi inyakba nguogo aser parnok rongnung karbo parnok maitsü miimbangtsü atema mask semer liasü, ta ashi. Iba telok yagisa, India indang Ministry of Home

Affairs nungi temelaba anguba sülen security force temi teyari agüja Kuki nunger telungpurtemi inyakshangshia liasü, ta ashi.

Kasa sangdong ajangasa, yimtsüng nung teraksatsüba bener arutsüba ya Kuki nunger telungprutemi jelia sentong yanglur Tangkhul nunger anema inyakshangshiba lir ta ashiba den, World Kuki-Zo Intellectual Council (WKZIC)-i iba tatalokba nung parnok akoksar ama jembishnüba aitsüogo koba ajanga India Ato Kilonser anisar ta ashi.

NSCN (IM)-isa, security force aser Kuki nunger telungpurtem longjemer inyakba ya meimchir temeden anema lir, ta ashi.

Meghalaya sorkari Tura nung five-star hotel atema ali agütsü

Shillong, Tsüklai/February 12 (Agencies): Meghalaya sorkari February 11, 2026 nü Tura nung Holiday Inn Resort atema ali agütsüogo.

Iba ya Meghalaya nung five-star hospitality project trokbuba asütsü aser Shillong adener high-end tourism ulushitsü atema merangba sayur.

Iba mapatong ya Inter Continental Hotels Group (IHG) ajanga inyaktsü aser parnoki sorkar meyong public-private partnership model kübok Polo Orchid property renlokdaksütsü.

IHG-i iba mapatong asoshi Rs 130 crore enoker aser Tura o Garo Hills region nung mezüngbuba five-star hotel asütsü.

Meghalaya nung 2020 tashi nung five-star hotel ka danga

maliasü, ajisüaka tangbo Marriott ajanga Courtyard aser Vivanta hotel ana lapokogo.

Maneni, Sohra nung Lemon Tree Hotels, Holiday Inn Resort aser Taj Umiam Resort and Spa teyangludak lir.

"Iba mapatong ya hospitality venture dak alia rongsenketzüng asalentong tulu ka lir. Hotel tem ya infrastructure tuluba nung shilem ka lir" ta Chief Minister Conrad K. Sangma-i ashi.

Onoki sorkar akümdang Meghalaya rongsenketzüngji \$4 billion den teküpok liasü saka tangbo \$7 billion tera agi dang majung lir ta pai metetdaksü.

"2047 tashi nung Meghalaya ya \$150 billion economy kümdaksütsü atema nukjidong yua lir. Iba ya five-star hotel

ka dang masü saka Tura, Garo Hills aser Meghalaya renlokba indang onoki jembir" ta CM Conrad-isa ashi.

"Ali agütsüba ya tourism sector asoshi tongtipang mera ka lir. Meghalaya rongsenketzüng nung tourism ya kanga tongtipang aser Garo Hills ya eco-tourism destination ka akümtsü lenmang lir" ta Tourism Minister Timothy Shira-ia ashi.

Paisa local entrepreneurs yaritsü atema Chief Minister's Meghalaya Homestay Mission kübok 70% subsidy agütsüba osang nenshia metetdaksü.

Inter Continental Hotels Group-i Meghalaya rongsenketzüng renlokba nung shilem agir aser Northeast nung maparen ulushir ta company ketdangsür kati ashi.

Tirap district nung NSCN-K züngsem ka temai adok

Itanagar, Tsüklai/February 12 (Agencies): Arunachal Pradesh kübok Tirap district nung NSCN-K (Khango Konyak) züngsem ka temai adokogo.

Wangdiap Lowang'er jabaso Lieutenant Wangkhu Lowang (32)-i Tirap Police tsüngdang temai adok ta osang ajanga ashi.

Pa ya Tirap district kübok Moktowa nunger lir aser pa police tsüngdang temai adokdang 44th Assam Rifles aser 36th Battalion CRPF nunger liasü.

Wangkhu Lowang ya NSCN-K (Khango Konyak) nung Army No. 21336 ta

jangjaogo aser pai 7.65 mm pistol ka den magazine aser injangtem bener arua agütsü.

Iba ajanga ozüng amertemi telungpurtem dang ozüng alema inyakshangshi anentsü aser temai adoktsü ajungmesoba tali jangjatsür ta ketdangsürtemi ashi.



February 12 nü Assam kübok Sootea tesem nung MP Gaurav Gogoi dena Congress lenir tejentem jaja aliba convoy ka mejangjaba nisungtemi amakba sülen iba tesem nung tensa mejungi kümogo. Parnok mena aliba gari dak long merploksü aser iba ajanga gari raksatsü. Iba sülen party-i police nem tashishiba ka agütsüogo. Lok Sabha MP Gaurav Gogoi, Congress lenir Ripun Bora, Debabrata Saikia, aser MP Rakibul Hussain nunger election atema nüboyimba sentong ka nung shilem agitsü aoba mapang iba lendong ataloka liasü.

Sri Lanka nung nisung 12 tasüba agi merenshitsü

Colombo, Tsüklai/February 12 (Agencies): Sri Lanka nung rongsenketzüng tia mejungu kuma nüburtem longkak aitba mapang May 2022 nung ozüing yanglur ka aser pa indang bodyguard ka tepsetba atema court kati Bodhbarnü nisung 12 nem tasüba temeremshi agütsütsü obendang agüja liasü.

Temelaba makai adenshiba, Amarakeerthi Athukorale aser pa indang bodyguard police officer ka asüba atema Gampaha High Court-i parnok ya aitsü, ta senior state counsel Oswald Perera-i ashi.

Athukorale ya ruling party nung ozüing yanglur ka liasü aser pa anüker tena mena aliba gari ya nisung telok kati Colombo nungi kilometer 30 shi pilar Nittambuwa nung anendaktsü aser tepseta liasü.

Iba lendong atalokba mapang Athukorale mesüra pa indang bodyguard-i longkak

aiter dak injang khaloktsü aser parnok tena arishia ki ka telung nung sapang aser mapang tatsüka lir police temi tena tasüman ngutet, ta police-i shia liasü.

Court-isa temelaba makai adenshiba nung ano nisung pezü aija küm pongu tsüngta tepuokdak ita trok ayutsü obendang agütsü, ta Perera-i ashi. Nisung 23 nem temeden agütsü.

Rongsenketzüng tia mejungu akumba mechi iba mapang yimsü süa aliba party lenirtem mapa nungi anendang ta takhangba agüja sorkar anema yimjung nung longkak aita alidang ruling party bhukumer temi May 2022 nung parnok amakba sülen azüdokshi tenzük. Iba mapang ozüing yanglur aser parnok bhukumer aika merenshia amshi aser ki kar raksaja rongdoktsü.

Sri Lanka indang iba rongsenketzüng tebilemtsü

ajanga nüngdakba osettsüset agi anünga akum aser iba yongji tir Gotabaya Rajapaksa menden nungi atsüngdok. Sri Lanka nung April 2022 nung sentüsü memonokteti akumba sangdong aser iba mapang sentüsü sen \$83 billion dak tema liasü.

July 2022 nung parliament-i opposition nungi ozüing yanglur Ranil Wickremesinghe ya tir kumdaktsü aser rongsenketzüng jenjang tajungba akum. Pa lenisüba kübok osettsüset nung jenjang ajema akum, local currency tashi itshi aser foreign reserves timba akum. Ajisüaka par sorkari mera tesashi kar agiba ajanga nüburtemi mepela.

Anti-corruption sapang nung ajemdaker 2024 küm Tir Anura Kumara Dissanayake ya shima liasü.

Court-i tasüba temerenshi agütsütsü tashi lir, saka Sri Lanka nung 1976 küm nungi tepuokdak alir alenseta südaktsüba mali.

Malungnen O



09.02.1973 – 31.01.2026

"Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong."

Rom 14:8

Na onok den iba lima nung arishi tatsüka alibato tesüngmangtsüka. Nü tongmelang Tamang, saka chichiba Tamang liasü. Ne sayu O tajungtem onok taküm tepiyong atema leniba ajok. Nü temeim mapatem onok asoshi senti mozü. Joko na Mali onok azüngmeyaker.

Asür **Mrs. Asangla Pongen** ajungbena iba alima nungi piladang Shirnokisa nübu, rongsen, Sarasadem aser tesüneptsüba O-tajung ajanga yaritepogo nenok Kija, Kibong, lokti ajak dang Kanga pelaba lemsateper.

Asen Tsüngremi nenok ajak maneni moajang ta onok Sarasadem.

Lokti tenung kar tetshia pelaba lemsateper:-

1. Chümoukedima Ao Baptist Arogo.
2. Chümoukedima Ao Senso Telongjem.
3. Ao Baptist Arogo Mungdang.
4. Ao Senden Mokokchung.
5. Mokokchung Town Ao Baptist Church Mission.
6. Kohima Ao Baptist Arogo.
7. Kohima Aor Telongjem
8. Dimapur Ao Baptist Arogo.
9. Peren Town Ao Baptist Church.
10. Wokha Town Baptist Arogo.
11. Aoyimsen Baptist Church, Karbi Anglong.
12. Nukmen Baptist Arogo, Doragapathar.
13. Aoyimti Baptist Arogo.
14. Model Village Ao Baptist Arogo.
15. Ao Baptist Arogo, Padumpukhuri.
16. Kumlong Baptist Arogo, Mokokchung.
17. Sungkamen Baptist Church, Mokokchung.
18. Ardang Baptist Arogo, Mokokchung Town.
19. Marepkong Baptist Church, Mokokchung.
20. Mokokchung Compound Baptist Arogo.
21. Lotha Baptist Church CMD.
22. Sovima Ao Baptist Arogo, CMD.
23. Eastern Nagaland People's union CMD.
24. Sumi Baptist Akukuhou CMD.
25. Yimkhiung Baptist Borü CMD.
26. Town Baptist Church CMD.
27. Aoyim Baptist Church CMD.
28. Chümoukedima Langpangkong Senso Telongjem.
29. Chümoukedima Ongpangkong Katetshir Telongjem.
30. Kohima Chuchuyimlang Senso Telongjem.
31. Northern Angami Youth organisation, Kohima.
32. All ranks and files of the office of commandant 1st NAP Battalion CMD.
33. Signal Platoon 1st NAP Battalion.
34. OC and Staff's Police Radio Station Peren.
35. Police Referral Hospital CMD.
36. Servanthood Bible College / Ao Student Fellowship (SBC).
37. Changki Senso Telongjem Chümoukedima.
38. Changki Fellowship Chumukedima.
39. Chuchuyimlang Senso Telongjem, Chümoukedima.
40. Dimapur area Chuchuyimlang Senso Telongjem.
41. Dimapur area Chuchuyimlang Kikumsungba Aso Elangtsur Telongjem.
42. Chümoukedima Ongpangkong Tetsur Telongjem.
43. Dimapur Area Langpangkong Watsu Telongjem.
44. Ungma Fellowship CMD.
45. Ungma Senso Telongjem Dimapur.
46. Ongpangkong Senso Telongjem.
47. Nihoto Ao Baptist Fellowship.
48. Dr. Neiphiu Rio, Chief Minister of Nagaland.
49. Shri. Tongpang Ozukum MLA & Advisor water resources Govt. of Nagaland.
50. Mr & Mrs Imkongmar Advisor Minority Affairs & Sericulture, Kohima Nagaland.
51. Shri. Temjenmenba (MLA & Advisor).
52. Mr & Mrs Nuklutoshi MLA, Chumukedima.
53. Shri. Jacob Zhimomi Minister PHED & Cooperation.
54. Shri. Ben LKR Commandant NAPTC, Chümoukedima.

- Temeim Kinungbo aser Kinungertem.

Sudan north tsütsü Nile ayong nung rongka makepok, nisung 21 asü



Khartoum, Tsüklai/February 12 (Agencies): Passenger mena aliba rong ka Sudan north tsütsü River Nile State kübok Nile ayong nung makepoka nisung 21 asü aser aika samar bushir, ta rara agi raksatsür aliba linük indang civil defence ketdangsür temi ashi.

Sudanese Sovereignty Council ajanga sangdong ka agütsüba nung tetsür aser tanur densema nisung 21 asüba asükhü lemsatepa liasü.

Sudan indang assistant director general of civil defence, Major General Qurashi Hussein-i osangbener dang Brehostibarnü ashiba agi, nisung trok mesüra tenet kumzükogo aser ano nisung ter dak tema samar aliba bushitettsü meranger.

Süng agi yangluba rong nungya tetsür, teintet rogo aser tanurtem densema passenger 30-35 tsüngta mena liasü aser River Nile State nung aliba Tayba al-Khawad aser Deim al-Qarai yimtsüng tsüngta jaja aliba mapang tzü telungi alu, ta Hussein-i ashi.

Iba lendong atalokba tesem nung yariteptsü asoshi Khartoum nungi telok balala yokogo aser river Nile State nung aliba civil defence teams ajungai samar alirtem bushir, ta ashi.

"Nile nung arakseta sür aliba temang tem onoki tang tashi bushitar," ta pai ashi.

Sudanese medical professionals indang lokti tentet Sudan Doctors Network ajanga X nung post ka lemsatepba

nung, iba lendong ajanga linük nung ayong nung senzüsempongba nung tashi maitba aser safety requirements maliba sayur, ta ashi.


Lendong atalokli yangji aliba ketdangsür aser civil defence teams temi meyaritetba ajanga tensa tamajungba kumdaktsü ta parnok ashi.

Ayong nung senzüsempongba mapang lendong nungi kumzüka ayutsü tekeraba nung mera agitsüla, ta parnok ashi.

Bodhbarnü lendong ya Sudan north tsütsü ayong lendong mezüngbuba masü. 2018 küm Nile ayong nung tanurtem school-i anir aoba mapang parnok mena aliba rong makepoka tanurtem timba sür nisung 23 süa liasü.

ALI TAYOKTSU LIR

XELHOZHE nung Aoyim den sentakteba aliba Ali 4 Pura dak tema lir. Tasazük Mashii angutsü. **94360 02285** **Rs. 250 per sq.ft** **Contact : 9436404186 / 9612897620**



MULUNGZEN O

ASO : 22-03-1930 — ASÜ : 07-02-2026

Onoki teti meima aliba tsürabur asür **L. Mapu Jamir**, ajungbena asüba mapang kija, kibong, lokti, yimden aser Arogo shirnokisa ozü mangyim jashi nung nübo, rongsen aser sarasadem tulu agi onok mulung süneptsüogo, nenok ajak dang ozü kinungertemi pelaba lemsateper.

Teyariteper ajak dangi tsüngdong arua pelaba melemsatepba atema sasa bilemer, anungji Tematiba Tsungremi nenok ajak moajangni ta onok tamang sarasadem.

~ Temeim Kinungtsü aser Chirnurtem.

Steve Smith PSL nung sen tasaktiba agi alizükba asayar kümogo



Tsüklai/February 12, 2026 (Agencies): Australia nunger batter tejen Steve Smith Pakistan Super League puti otsü nung sen tasaktiba agi alizükba asayar kümogo. Pa ya PSL 11buba atema PKR crore 14 agi alizüka liasü.

Smith shibai Australia indang T20 World Cup squad nung yirur alisang Mitchell Marsh melentsü lir, pa ya franchise tasenba Sialkot Stallions-i USD 500,000 agi alizüka liasü.

PSL ya team trok asaya aliba tang team ti kümogo aser Pakistan Cricket Board-i tang mezügbuba asayar auction ka benoka draft system tembangdaksüogo, koba taoba küm ter tashi benoka aruogo.

Auction koba Bodhbarnü

Lahore nung agia liasü iba nung bendanger asayartem rongnung David Warner, Adam Zampa, Daryl Mitchell, Mark Chapman, Mustafizur Rahman, Devon Conway, Rilee Rossouw, Tabraiz Shamshi, Dasun Shanaka, Kusal Mendis aser Marnus Labuschagne nungera densema liasü.

Ajak senteper asayar 103 franchise ti-i alizükogo. Pakistan nunger asayartem rongnung bowler Naseem Shah ya ajak dang nungi sen tasaktiba agi alizük. Pa Islamabad United puri PKR crore 8.65 agi alizük aser kasa mapang nung all-rounder Faheem Ashraf-a kasa franchise-i PKR crore 8.5 agi alizükogo.

Babar Azam Peshawar Zalmi puri PKR crore 7 agi meyipa agiogo aser club-i mechioki sen timtiba agi alizüka ayuba asayartem rongnung Saim Ayub temaba jenjang nung lir. Pa iba franchise yagi PKR crore 12.2 agi alizüka liasü.

PSL ya taküm March 26 nungi May 3 tashi asayatsü, koba Indian Premier League asayaba mapang kasa nung asütsü.

Franchise tasen ana Sialkot aser Hyderabad ya bendanglen aliba Pakistan nungi shishilembar anati PKR crore 185,000 aser PKR 175,000 agi alizükogo. Multan Sultans-a yokogo aser kibur melenba sülen Rawalpindi ta nüngja melenogo.

India team U17 Asian Cup nung defending champions den asayatsü

Tsüklai/February 12, 2026 (Agencies): India U 17 tebur football team Asia Cup atema 10benbuba qualify süogo. Qualifier nung parnok Iran, Lebanon, Palestine aser Chinese Taipei den asaya aser parnok temaba jenjang nung tembanga liasü.

Iba asayamung nung India team mezügbuba asaya Australia den asayatsü aser iba sülen Uzbekistan aser North Korea na den asayatsü.

Uzbekistan team-i iba asayamung tesüsuba koker lir aser parnok automatically qualify süogo. Australia team shirnok 2025 küm iba asayamung nung group stage nung tsüka liasü, parnoki takümbo Jordan, Bhutan aser

Philippines nunger akokba sülen qualify süogo.

North Korea, shirnoki taoba mapang iba asayamung anaben koka lir, parnok 2025 küma semi-finals tongogo aser 2026 küm asayamung atema-a indang indanga qualify süogo.

Group A nung hosts Saudi Arabia den Tajikistan, Thailand aser Myanmar dena lir aser Group B nung Japan, Indonesia, China aser Qatar lir. Group C, South Korea, Yemen, Vietnam aser United Arab Emirates nunger toktepba angutsü.

Asayamung nung telok ajak nungi temaba jenjang nung tembangba team ana quarter-finals atema qualify asütsü aser FIFA U17 World Cup Qatar 2026 atema-a qualify asütsü.

Nottingham Forest-i manager Sean Dyche mapa nungi anentsüogo



Tsüklai/February 12, 2026 (Agencies): Nottingham Forest-i anogo 114 nung asaya 17 asayaba sülen manager Sean Dyche mapa nungi anentsüogo. Tang asaya aliba season nung Forest puri manager asembuba mapa nungi anentsüogo.

Forest pur Premier League bonglang nung aliba Wolves team den kidang goal kaka danga magütsütettsü draw asüba sülen ghonda asemshi dang lir iba osang ya sangdonga liasü. Asaya draw asüba sülen parnok asaya 12 asayatsü anunga lia relegation zone-i point asem agi dang mai lir, aser tang club kibur Evangelos Marinakis-i iba jenjang ya agiogo.

Forest pur tang asaya aliba season nung tang agi manager pezübuba bushidar.

Crystal Palace aser Wolves na den draw asüba den Leeds pur goal 3-1 agi mekoki asaya asem tashi takok monguteti asayaba sülen iba telemtetba ya agia liasü. Wolves den

asayaba mapang Forest puri goal nung 35 ben metsü saka goal ka danga midaktsütet.

Arishi küm 54 tain Dyche-i pa mapa nungi anentsütsü ta meteter liasü.

"Kibur-i kü dang kanga jungogo," ta pai asaya tembangba sülen ashi. "Football nung tang temelenshi bener arutsü shimra aji parnok telemtetba asütsü.

"Kiburi temelenshi bener arunera pa mulung, aser tang football asayaba yimya yamaji dang aser aji ochiba lir," ta pai ashi.

Nuno Espirito Santo aser Ange Postecoglou na mapa nungi anenba sülen tang Dyche-a anidakogo. Santo lenisüba nung Forest pur taoba season Europa League-i ai saka asayar transfer dak sendakba nung mangatettep adoka pai club toktsü.

Forest pur February 19 nü Fenerbahce nung oa Europa League asayatsü aser iba sülen kidang Liverpool den asayatsü.

T20 World Cup: Sri Lanka-i run 105 agi Oman kokogo



Tsüklai/February 12, 2026 (Agencies): Co-hosts Sri Lanka-i Brehostibarnü T20 World Cup nung run 105 agi Oman koka iba asayamung nung asaya anabuba atonga kokogo.

Pavan Rathnayake, Kusal Mendis aser captain Dasun Shanaka nungeri half century kaka yanglu Sri Lanka-i run 225 yanglu, koba tang tashi nung iba asayamung nung run timtiba yangluba liasü.

Asaya tanabuba shilem nung associate nation Oman-i telangzüba tajung magütsütet aser parnoki asayar 9 out ser run 120 dang yangluteta liasü.

Sri Lanka team-i asayar 3 out ser run 136 yanglua aliba

mapang Shanaka batting ameni ai aser pai ball 19 nung run 50 yanglu, kong four ana aser six pongu azükba densema liasü.

Iba ya Sri Lanka nunger rongnungi T20 internationals nung half century takaratiba yangluba liasü. Paiza 2023 küm India den Pune nung asayaba mapang ball 20 nung half century yanglur liasü.

Powerplay nung opener Pathum Nissanka aser Kamil Mishara na out asüba sülen Rathnayake-i ball 28 nung run 60 aser Kusal Mendis-i ball 45 nung run 61 yanglua team jenjang junga kümdaktsür aliba mapang Shanaka-i kanga junga asaya-a parnoki asayar 5 out

ser run 225 yanglu, koba Sri Lanka atema T20 World Cup puti otsü nung run timtiba yangluba lir.

Oman pur batting amenba mapang Muhammad Nadeem aser Wasim Ali nati dang junga asayateta liasü.

Arishi küm 40 tain Nadeem-i ball 52 nung half-century yanglu aser pai out mesüi run 53 yanglu aser kasa mapang nung Wasim-i ball 20 nung run 27 yanglua liasü.

Sri Lanka, shirnoki mezügbuba asaya nung Ireland run 20 agi kokogo parnok taruba asaya Hombarnü Australia den asayatsü aser Oman team Honibarnü Ireland den asayatsü.

BILEMDANGANG

"Tangari meinyaktetba inyaktetertemji tangari teti süksir."